

VENDIM
NR. 45, DATË 28.3.2014

PËR PLANIN E DHËNIES SË NDIHMËS SHTETËRORE “PËR KRIJIMIN E FONDIT TË EKONOMISË KREATIVE (ARTIZANATI)”

Komisioni i Ndhmës Shtetërore, me pjesëmarrjen e:

- | | |
|-----------------------|----------|
| - Z. Arben Ahmetaj | kryetar |
| - Znj. Mimoza Dhëmbi | anëtare |
| - Z. Edmond Ademi | anëtar |
| - Z. Ahmet Mançellari | anëtar |
| - Znj. Anduena Dedja | anëtare, |

në mbledhjen e tij të datës 28.3.2014, shqyrtoi raportin për planin e dhënies së ndihmës shtetërore “Për krijimin e fondit të ekonomisë kreative (artizanati)”. Raportimi është bërë pranë Drejtorisë së Tregut të Brendshëm nga Drejtoria e Mbështetjes së Sipërmarrjes në Ministrinë e Zhvillimit Ekonomik, Tregtisë dhe Sipërmarrjes dhe është regjistruar në regjistrin me nr. AI/N/14/2014.

OBJEKTIVI/AT: Plani për dhënien e ndihmës ka si objektiv zhvillimin e sektorit të artizanatit dhe zejtarisë në Shqipëri, duke krijuar një mjedis të favorshëm për aktivitete më të qëndrueshme ekonomike dhe krijimin e vendeve të reja të punës.

BAZA LIGJORE: Vendimi i Këshillit të Ministrave nr. 954, datë 5.9.2012 “Për krijimin e fondit të ekonomisë kreative (artizanati)”, si edhe udhëzimi i përbashkët nr. 1, datë 20.2.2014 “Për miratimin e rregullores së funksionimit të fondit të ekonomisë kreative (artizanati)” i ministrit të Zhvillimit Ekonomik, Tregtisë dhe Sipërmarrjes dhe ministrit të Financave.

Komisioni i Ndhmës Shtetërore, pasi shqyrtoi raportin e përgatitur nga Drejtoria e Tregut të Brendshëm dhe gjithë dokumentacionin mbështetës,

VËREN SE:

1. Mbështetja financiare do të jepet për projekte në sektorin e artizanatit që mbulojnë zhvillimin e produkteve të reja, marketingun e tij, si dhe kualifikimin dhe ndërtimin e kapaciteteve menaxheriale të ndërmarrjes aplikuese. Pa ndihmën e shtetit, këto aktivitete nuk do të mund të ndërmerreshin, për shkak të mungesës së burimeve financiare të domosdoshme për realizimin e projekteve tregtare.

2. Skema ka një kohëzgjatje zbatimi 4 (katër) vjet. Llogaritja e kohëzgjatjes fillon nga momenti kur skema do të nisë zbatimin në vitin e parë të saj.

3. Dhënës i ndihmës është Drejtoria e Mbështetjes së Sipërmarrjes në Ministrinë e Zhvillimit Ekonomik, Tregtisë dhe Sipërmarrjes (MZHETS), ndërsa autoriteti përgjegjës për zbatimin dhe monitorimin e kësaj mase do të jetë Agjencia Shqiptare e Zhvillimit të Investimeve (AIDA).

4. Përfitues të ndihmës do të jenë ndërmarrjet e vogla dhe të mesme, që operojnë në sektorin e artizanatit sipas kushteve të përcaktuara në rregulloren e funksionimit të fondit.

5. Ndihma do të jepet në formë subvencioni nga buxheti i shtetit për ndërmarrjen përfituese. Shuma gjithsej e ndihmës, sipas skemës së njoftuar është 40 000 000 (dyzet milionë) lekë, për një periudhë zbatimi prej 4 (katër) vitesh. Intensiteti maksimal i ndihmës për një përfitues në varësi të projektit konkurrues është 60% deri në 80% e kostove të pranueshme dhe të miratuara brenda kufirit prej 500 000 (pesëqind mijë) lekësh.

6. Në kuptim të nenit 4 të ligjit për ndihmën shtetërore, masa përbën ndihmë shtetërore, nëse përmbushen në mënyrë kumulative kushtet: a) aktivizohen burime shtetërore; b) jepet një avantazh ekonomik; dhe c) sjell pasoja mbi konkurrencën.

a) Prezenca e burimeve shtetërore

Ndihma financohet nga burime shtetërore; autoritetet shtetërore (MZHETS-ja dhe AIDA) menaxhojnë dhe kontrollojnë fondin e ekonomisë kreative (artizanati), përzgjedhin përfituesit dhe kryejnë pagesën nëpërmjet fondit.

b) Avantazhi ekonomik dhe selektiviteti

Përfituesit e financimit publik kryejnë një aktivitet ekonomik në sektorin e artizanatit dhe zejtarisë, duke prodhuar produkte, të cilat tregtohen brenda dhe jashtë vendit. Skema favorizon ndërmarrje të caktuara kundrejt ndërmarrjeve të tjera. Masa është selektive dhe i jep një avantazh ekonomik përfituesve të saj.

c) Pasoja mbi konkurrencën

Zbatimi i skemës do të nxisë zhvillimin e aktiviteteve ekonomike në tregun e artizanatit, me qëllim krijimin e produkteve të reja me origjinë shqiptare, për të cilat do të rritet interesi edhe nga ana e turistëve të huaj. Zbatimi i skemës do të zgjerojë përfitimin e saj, duke mundësuar zhvillimin nga pikëpamja sociale-ekonomike dhe kulturore e zonave të ndryshme në Shqipëri. Pasoja në konkurrencën në treg është e vogël.

7. Masa përbën ndihmë shtetërore në kuptim të nenit 4 të ligjit për ndihmën shtetërore dhe bie brenda fushëveprimit të nenit 13 (c) të ligjit, duke qenë se objektivi i skemës është nxitja e veprimtarive ekonomike të ndërmarrjeve që operojnë në fushën e artizanatit, të cilët nuk kanë kapacitet të mjaftueshëm për të investuar në zhvillimin e produktit, dhe se ndihma jepet deri në atë masë sa nuk është në kundërshtim me detyrimet e marrëveshjeve ndërkombëtare të ratifikuara nga Republika e Shqipërisë.

PËR KËTO ARSYE,

Komisioni i Ndhmës Shtetërore, në bazë të nenit 13, shkronja “c” dhe nenit 17, shkronja “a”, të ligjit nr. 9374, datë 21.4.2005 “Për ndihmën shtetërore”, të ndryshuar,

VENDOSI:

1. Të miratojë planin e dhënies së ndihmës shtetërore “Për krijimin e fondit të ekonomisë kreative (artizanati)”.
2. AIDA, brenda datës 31 mars të çdo viti, të paraqesë raport për impaktin e ndihmës shtetërore gjatë vitit paraardhës financiar.
3. Të japë çdo informacion që do të kërkohet për monitorimin dhe kontrollin e ndihmës së dhënë.
4. Të ruajë të gjitha të dhënat për zbatimin e skemës deri në dhjetë vjet, pasi ndihma e fundit individuale të jetë dhënë në kuadër të kësaj skeme.
5. Ky vendim hyn në fuqi menjëherë.

KRYETARI
Arben Ahmetaj